

兵部
綠營處分例

欽定大清會典事例

卷六百三十二

欽定大清會典事例卷六百三十二

兵部

綠營處分例

外海巡防

內河巡防

外海巡防。康熙二十八年議准。水師總兵官俱應親身出洋。督率官兵巡哨。違者照規避例革職。四十三年覆准。廣東省沿海地方。以千把總會哨。副參遊每月分巡。總兵官於每年春秋二季出洋總巡。四十七年覆准。江南省蘇松狼山兩鎮。各於本管洋面。親身總巡。每歲一輪。將出洋回汛日期。呈報該督提察覈。又覆

准浙江省定海温州黃巖三鎮出洋總巡。每年定於二月初一日起至九月底止。○五十年

諭。朕於水陸兵丁。年久深悉其情事。船至海洋。必俟風候。若不候時。不察風汛。而欲强行。必至兵船同損。官兵皆係朕歷年養育之人。如遇有賊。自應效死。若無賊。而徒以巡哨受傷。實為可惜。該總兵官須留意於此。大加謹慎。○五十一年議准。海洋巡哨官兵。盤獲形迹可疑之船。如人數與執照不符。並貨物與稅單不符者。限三日內稽查明白。如係賊船。交與地方官審究。果係商船。即速放行。申報該上

司存案。如以賊船作為商船釋放。或以商船作為賊船。故意稽遲擾害者。皆革職。索取財物者。革職提問。該上司察出揭叅者免議。如釋放賊船。該上司失察者。照失察諱盜例議處。稽遲擾害商船。該上司失察者。照失察誣良為盜例議處。五十二年覆准。各營巡哨船。刊刻某營某字某號。舵工水手人等。各給予腰牌。備書姓名。年貌籍貫。又覆准。山東省與

盛京對峙。水師官兵各巡本管洋面。金州之鐵山。舊旅順。新旅順。海帽坨。蛇山島。並頭雙島。虎平。

島。甯子溝。天橋廠。菊花島等處。皆係

盛京所屬。令該將軍委撥官兵巡哨。北隍城島。南隍城島。欽島。砣磯島。黑山島。廟島。長山島。小竹島。大竹島。至直隸交界。武定營等處止。並成山頭。八家口。之罘島。崆峒島。養馬島。至江南交界等處止。皆係山東所屬。令登州總兵官委撥官兵巡哨。至鐵山與隍城島中間。相隔一百八十八里。其中並無泊船之所。自鐵山起九十里之內。

盛京官兵巡哨。自隍城島起九十里之內。山東官

兵巡哨如遇失事。各照地界題叅。○又覆准官弁駕船巡哨。如船被賊焚劫者。革職提問。船仍著落賠補。若實係遭風擊碎。該管上司查明出結。詳報該督撫提鎮保題。免其賠補。動支錢糧修造。儻有捏報情弊。將該官弁革職提問。濫行出結之該上司革職保題之督撫提鎮降一級留任。○五十五年覆准福建省水師提標五營。澎湖水師二營。臺灣水師三營。分撥兵船各書本營旗號。每月會哨一次。彼此交旗為驗。如由西路去者。提標哨至澎湖交旗。澎湖哨至臺灣。

交旗皆送臺灣鎮查驗。由東路來者。臺灣哨至澎湖交旗。澎湖哨至廈門交旗。皆送督撫查驗。如某月無旗交驗。遇有失事。照例題叅。○五十六年覆准。福建省臺灣澎湖兩協副將。歲率三船親身出洋。總巡各本管洋面。兩協遊守分巡各本汛洋面。海壇金門二鎮各分疆界為南北總巡。每歲提標撥出十船。以六船歸巡哨南洋。總兵官調度。四船歸巡哨北洋。總兵官調度。其臺澎二協副將。金門海壇總兵官。均於二月初一日起九月底止。期滿撤回。至各營分巡官兵。

挨次更換。如遇失事。各照例題叅。五十七年
覆准。廣東省南澳屬閩粵交界。瓊州孤懸海外。
南澳總兵官及瓊州水師副將。各率營員專巡
各本營洋面。自南澳以西。平海營以東。分為東
路。以碣石鎮總兵官澄海協副將。輪為總巡。率
領鎮協標員。及海門。達濠。平海。各營員為分巡。
自大鵬營以西。廣海寨以東。分為中路。以虎門。
香山。二協副將。輪為總巡。率領二協營員。及大
鵬。廣海。各營員為分巡。自春江協以西。龍門協
以東。分為西路。以春江。龍門。二協副將。輪為總

巡率領二協營員及電白吳川海安碭洲各營員為分巡。共分為三路。每年分為兩班巡察。如遇失事。照例題叅。○雍正三年議准。官弁出海巡哨。如有洋面失事。隱諱不報者。該將軍督提訪實。題叅革職。○四年題准。直隸省天津水師官兵。於四月起至九月止。駕船出洋巡哨。○八年議准。福建浙江兩省巡哨官兵船。挨次兩月更換。如風潮不順。到汛愆期。統俟陸續到汛交代。具報該上司查覈。遇有叅處之案。憑報文內職名揭叅。○又議准。各省沿海營汛。原分水陸。

水師惟在大洋游巡。其陸路濱海遶岸。潮退膠淺。為水師巡船之所不到。其中各色小艇。隨潮飄泊。或有暗載違禁貨物。甚至乘機偷劫。此等處所。設立小號巡船。○九年議准。凡巡海船於未出口之前。取同船兵丁不敢搶物為匪連名甘結。在船該管官加結申送該上司存案。回哨日。仍取同船兵丁在洋並無搶物為匪。扶同隱匿。事發願並坐甘結。送該上司查覈。如弁兵在洋搶奪商人財物。該管官不係同船。失於覺察。照失察營兵為盜例議處。若通同庇匿。革職提

問。督撫提鎮不題叅者。照徇底例議處。○十三年覆准。福建省南澳鎮左營。及金門鎮之銅山洋汛。歸南澳鎮巡察。每年上班巡期。委右營守備與廣東鎮協會哨。左營遊擊與海壇金門兩鎮會哨。該總兵官駐鎮彈壓。下班巡期。委右營遊擊出巡。總兵官親率兵船與兩鎮會哨。以左營遊擊留營彈壓。○乾隆元年覆准。廣東省西路洋面。分為上下二路。自春江至電白。吳川。碇洲。為上路。上班以春江協副將為總巡。下班以吳川營遊擊為總巡。率領春江。電白。吳川。碇洲。

各營員為分巡。均於放雞洋面會巡。至碓洲一帶。自海安至龍門為下路。上班以海安營遊擊為總巡。下班以龍門協副將為總巡。率領海安龍門各營員為分巡。均於瓊州洋面會巡。所屬一帶。至上路之電白營遊擊。上班隨巡。聽春江協副將統領。電白營守備。下班隨巡。聽吳川營遊擊統領。如遇本營洋面失事。分別題叅。十二年奏准。江南海洋。每年二月至九月。蘇松鎮標中左右奇四營之遊守八人。分為四班。每營遊擊分巡兩月。各營守備與遊擊錯綜換班。每

人隨遊擊分巡兩月。川沙吳淞二營之參將守備共四人。每人分巡兩月。未輪班之各營。委撥弁兵駕舟隨巡。至於十月至正月。令鎮標四營。川吳二營。每營各管二十日。如有失事。將分管之營題叅。該鎮總兵官仍親身巡察。所有出洋回汛日期。仍報督提稽考。狼山鎮標於二月初一日起。右營遊擊率領中左右三營官兵。在於內外洋面巡哨。至九月底期滿回營。該鎮總兵官亦親身巡察。將出洋回汛日期。報督提稽考。○十七年議准。山東省登州鎮水師。每年五六

七八月間。官兵出洋。南北東三汛。各在該管地界。彼此往來巡防。其沿海陸路營汛。亦令不時瞭望。不許怠惰推諉。○又議准。江南省蘇松狼山二鎮。各有所管洋面。皆係一望汪洋。並無島澳。可以收泊船隻。僅能暫時寄碇。每年分委將備輪班出巡。飭發令箭。逐汛交傳。設立印簿。填明接到月日。仍令該鎮總兵官不時出洋。上下梭織巡察。○又覆准。福建省海壇鎮。於三月初一日。九月初一日。與金門鎮會哨於涵頭港。五月十五日。與浙江溫州鎮會哨於鎮下關。金門

鎮於三月初一日。九月初一日。與海壇鎮會哨於涵頭港。六月十五日。與南澳鎮會哨於銅山大澳。南澳鎮於六月十五日。與金門鎮會哨於銅山大澳。會哨之期。總督豫遣標員前往指定處所等候。如兩鎮同時並集。即取聯銜印文繳送。或一鎮先到。點驗兵船。取具印文先行繳報。即准開行。一鎮後到。別取印文繳送。總以兩鎮赴指定處所為準。如遲至半月以後不到者。查係無故偷安。即行叅處。至分巡洋汛相離本不甚遠。一月會哨一次。該鎮總兵官差員取結通。

報如有違誤。即行揭叅。若徇隱及失察者一併
叅處。○又覆准浙江省定海鎮。於三月十五日。
九月十五日。與黃巖鎮會哨於健跳汛屬之九
龍港。五月十五日。與江南崇明鎮會哨於大羊
山黃巖鎮。於三月初一日。九月初一日。與溫州
鎮會哨於沙角山。三月十五日。九月十五日。與
定海鎮會哨於九龍港。溫州鎮。於三月初一日。
九月初一日。與黃巖鎮會哨於沙角山。五月十
五日。與福建省海壇鎮會哨於鎮下關。其會哨
之期。總督豫遣標員前往。指定處所等候。及兩

鎮出具印文繳送之處均照福建之例行。○又覆准廣東省水師各營總巡指地定期會哨。如同時並集聯銜具文通報。儻因風信不便先後參差。先到者即具文通報。巡回本路洋面。後到者亦於到日具文通報。巡回本路洋面。至分巡各官每月與上下鄰境會哨一次。或先西後東。或先東後西。豫為酌定。一經會合。即聯銜通報。如有懈怠捏飾。即令總巡官揭叅。○二十九年奏准廣東省沿海各鎮協營總巡三月初十日碣石鎮巡至深澳與南澳鎮會同通報左翼鎮。